

PM: Perhimpunan di Stadium Merdeka bergantung pada polis
Malaysiakini.com
July 6, 2011

Perdana Menteri Datuk Seri Najib Tun Razak hari ini berkata keputusan untuk membenarkan perhimpunan diadakan di Stadium Merdeka pada Sabtu ini akan dibuat oleh pihak berkuasa terutamanya polis.

"Itu kita serah kepada pihak berkuasa terutamanya polis untuk tentukan keselamatan dan sebagainya," katanya pada sidang media selepas melancarkan Yayasan Usahawan Wanita Cina Malaysia di Klang.

Beliau berkata sekiranya ada permohonan rasmi daripada penganjur untuk mengadakan perhimpunan itu ia perlu memenuhi syarat antaranya ialah pertubuhan itu mestilah berdaftar.

Selain itu, ia juga perlu mematuhi syarat-syarat keselamatan yang akan dikenakan oleh polis, katanya.

Menjawab soalan wartawan bahawa BERSIH 2.0 adalah pertubuhan haram, beliau berkata: "Bersih adalah haram, ia tidak pernah berdaftar."

Ditanya bilakah pertemuan antara beliau dengan pengerusi perhimpunan itu, Datuk S.Ambiga, beliau berkata: "Saya tak kata akan jumpa Ambiga. Kerajaan boleh bermaksud orang lain yang boleh mewakili kerajaan...kerajaan tidak bermakna saya secara peribadi."

Najib juga berkata beliau masih belum menerima sebarang surat permohonan dari Bersih untuk bertemu dengan beliau berhubung perhimpunan tersebut.

- Bernama